

八瓊室金石補正

第四八冊

八瓊室金石補正卷一百二

太倉陸增祥撰

男 繼輝校錄

吳興劉承幹覆校

宋 二十一

中獄廟鐵人背題字

高廣未計上下共十七行行字不
一字徑七分許陽文正書在登封

維那主呂榮忠武軍匠人董瞻美記治平元年三月二

十八日秦□父秦順王晟

此在上方

登封縣押□劉琰押司張簡治平□年三月二十八日

宋文彪施主宋店董思永記□店施主王□

鐵人頂上尙有熙甯二年題字未之見也

三門洞石刻五段

在東安

余藻題名

高三尺一寸廣二尺五行行八字字徑三寸許正書左行

大宋

天子改治平之初年祠曹郎余藻奉

命提點廣西刑獄季秋下弦經丐因題

文林郎守永州零陵縣令梁宏

此行小字在大宋二字下左偏此下

尙有雙行小字僅一命字可辨

余藻字質夫鴈門人廣西隱山龍隱巖雉山皆有

其題名均係是年冬所刻是初到粵西時也與此

正合梁宏見澹巖題名

高秉題名

高二尺四寸廣一尺八寸五行行七字字徑二寸餘正書

提點刑獄公事高秉平叔高遵治公弼因按屬部同遊
三門洞時熙甯元年十月十七日題

與九龍崑一刻同日所題高秉高遵治通志職官
失載可據補之

柳應辰題名

高二尺五寸五分廣一尺五寸五分四行行八字字徑三寸許正書

刻浯溪心記之明年十一月二十二日獨遊零陵之三
門巖柳應辰記

浯溪心記刻於熙甯七年此蓋八年十一月所題

也其稱零陵之三門巖者時未割隸東安也

豐蔭題名

高二尺七寸廣二尺六寸題名八行行十四字字徑一寸三分跋七行行字不一字

徑五分

俱正書

寶祐戊午孟秋三日鄧麓豐蔭以本路提點刑獄改廣
右過三門洞訪焉恠、奇、僊佛之居神龍之宅也摩
挲岩鏤左則廣西憲余公書于治平右則湖南憲高公
書于熙甯今幾二百年仕任游觀適相契合殆有數存
洞舊屬零陵今隸東安而東安正僕鄧麓所居里名尤
非偶然於是乎書

希鉞恭承

提刑提舉節制寶謨戶部 先生肅將

旌節移憲桂林道經東安之三門洞、有古鐫拂之
及治平廣經使與夫熙甯湖南高□使所紀歲月今

先生以湘憲易節嶺右乃合 二公而爲一者似若
有豫□之地豈非事之開先乎矧曰

錦鄉與東安號名同則今之經從果非偶爾

先生戒爲之勒石俾與余高鼎立而三敢不敬承
寶祐戊午七夕門生秉義郎特差權發遣荆湖南路
兵馬副都監永□□劄兼安撫大使司僉廳經理東

安縣事趙希鉅頓首百拜謹書提督鑄石淮勇副尉
前辟融□樂善知寨權富州遂溪縣尉□胡森□

豐蒞趙希鉅均不見於湖南通志職官按廣西隱
山開慶元年李曾伯題名內有憲倉四明豐蒞華
景洞開慶紀功記有提刑提舉兼參謀四明豐蒞
即其人也蓋以提點刑獄兼提舉常平倉者

高安劉某題名

高一尺五寸廣一尺一寸四行
行六字字徑一寸五分正書

高安劉

下

庾使節按部曾遊時景定癸亥八月廿有七

日

劉君名已泐永志官表理宗時有零陵簿劉應龍

籍高安或即其人歟

右三門洞石刻五段在東安自來未有道及者并
三門洞之名亦不見於志荒僻可知已去盧洪司
北道十里地名九山鋪有洞焉洞有三門洞內一
石高數丈狀如雲頭層疊不窮健兒能攀援而上
焉邱壑眾多奇異萬狀洞頂上漏天光較之澹巖
爲尤勝題名五方均在洞內洞外碑盡剝蝕矣仲
維所述如是夫此數刻者幸遇仲維得以顯於今
日雖晚出而尙不終晦洞外諸刻不遇其人以至
摩滅殆盡迄無一人知今雖知之而已不可拓視

矣可慨也

隱山題刻十二段

在桂林

質夫等題名

高二尺一寸廣二尺七寸六行行字不齊字徑三寸五六分正書左行

治平元年仲冬十八日同魯國長源吳興彥聖遊鴈門

質夫因題于洞之左崖

長源孔延之也時同轉運判官彥聖姚原道也前
安撫勾當公事質夫余藻也時提點刑獄俱見龍
隱巖題名又雉山亦有題名姚原道署稱機宜伏
波山題名則稱新知鬱林州在此後一年也孔延
之有桂州座宜賊首級記在鎮南峰時在慶曆五

年其署銜稱欽州軍事推官將仕郎試祕書省祕書郎權節度推官

呂愿忠北牖洞詩

高二尺三寸廣二尺一寸十行行字不一字徑一寸五分許正書

北牖洞

南牖聊寄傲北牖有涼風崑洞幽深處結茅容老翁

郡守呂愿忠叔恭紹興甲戌季春十三日自資慶來游隱山六洞乃八桂崑洞最奇絕處各留一小詩以紀所聞是日機宜劉襄子思不期而集

據題記六洞均有詩刻此特其一也廣西通志云詩惟朝陽漫滅不可識郡守至不期而集五十五

字每洞詩下皆有之呂愿忠洛陽人劉襄祥符人
粵西文載云呂愿忠廣西經略安撫使紹興間在
南丹諭諸蠻三十一種以其地皆爲羈縻州縣宋
史秦檜傳云靜江有驛名秦城呂愿忠率賓僚共
賦秦城王氣詩以媚檜而此詩頗有恬澹之致詩
果可知人乎哉六洞者朝陽夕陽嘉蓮白雀南華
北牖也唐李渤所命名嘗各題篆額於洞今不可
見

張子題招隱字并記

拓本二紙一高一尺七寸廣二尺七寸二字字徑尺許款四字

字徑一寸二分一高一尺三寸廣四尺十七行
經五字第十二行六字字徑一寸五分俱行書

招隱

橫列

張敬夫書

右一石

淳熙戊戌歲六月丙戌廖重能置酒約詹體仁張敬
夫登千山觀泛舟西湖荷花雖未盛開水光清淨自
足銷暑視北牖洞之前有豚地體仁欲爲小亭名以
招隱敬夫北歸有日不及觀斯亭之經始獨預書招
隱二字以貽之

按張敬夫於廖重能酒間題招隱二字以貽詹體仁
且記其事非重能手筆廣西通志以爲廖重能題名
非也是年閏月上澣招隱亭成詹體仁約廖重能飲
酒落之回視題扁與石間留字有懷張敬夫以所書

招隱二字鑱石時敬夫去桂尙未踰月體仁題刻亦在隱山前多殘缺通志以桂勝補之廖重能作繼能

殆沿桂勝之誤

金石續編

右刻在臨桂隱山招隱巖戊戌爲淳熙五年是年

閏六月下澣刻石見詹體仁題名

詹體仁刻招隱字題記

高一尺二寸廣存二尺四寸首行曼威後十五行行六字

字徑寸

正書

前缺俟攷首行曼威

□□也水光山色隱映萬狀畢

陳

於尊俎之

間遂登北牖洞捫崖剔蘚得唐刺史李渤寶厓閒題名

蓋西湖窠勝處也回視題扁與石間留字有懷張敬夫

矯首飛鴻爲之蒲引并以所書招隱二大字鑲諸石云
淳熙戊戌閏月下澣

前缺不知幾何姑就所見錄入續編云前多殘缺
通志以桂勝補之按通志所載作招隱亭中詹體
仁約廖繼能飲酒落之十五字下接水光山色云
云重能誤繼能也作之亦不相同詹體仁名儀之
桐廬人廣西通志云淳熙二年知靜江府十二年
再任按隱山淳熙丁未題名云小酌招隱亭亭蓋
體仁將漕時所建俯仰十年感慨賦詩是時爲漕
使也紹定庚寅水月洞陳疇題名稱爲連帥是又

嘗帥桂州矣

黃德琬等題名

高一尺五寸廣二尺一寸十一行行七字字徑一寸三分正書

拍隱之勝冠絕桂林
淳熙五年仲秋辛亥建安黃德琬
廷瑞昭武龔揔會叟延平張士侏子真邯鄲劉乘晉伯
莒國朱虞卿元凱瑯琊王文若謂之長沙李揆起宗關
中馬甯祖奉先汎舟來遊

王正已題名

高五尺廣九寸二行行十二字七字字徑三寸餘行書左行

淳熙壬寅六月十四日王正已□仁父携帑來游

宋詩紀事王正已四明人珩之子淳熙中官大府卿
按正已提點廣西刑獄見金志職官帑經傳皆以爲

妻孥字左氏襄十四年傳文字并帑于戚釋文帑子

也

廣西通志

劉愈等題名

高二尺三寸廣二尺八寸十五行行八字字徑二寸五分正書

北巖劉愈晞韓以孟冬初澣約建安雷霆復之桂陽姚
宋佐輔之禾川劉伯源慶長金華徐由已克仁號略楊
芳懷英圯上邵康年仲安長沙曾倫長卿安成彭世亨
元泰探勝湖上屬時久晴風景怡暢崇崖巨壑萬狀畢
陳泛澄升高窮所未到相羊周覽改席精廬清興有餘
盃行無筭竟夕乃還實淳熙丁未歲也

管定夫等題名

高一尺二寸廣二尺四寸十八行行九字字徑一寸許正書

計使括蒼管定夫帥守巨野李誠之後先來桂且久未
嘗一忒西湖巖洞壬申初伏始獲游覽自資慶腰輿上
千山觀憩西峰中峰隱山袁茗談方外移時汎舟訪招
隱巖竇幽邃奇石林列湖光潋灩雲錦帶暎誠可賞已
而雷聲殷空雲頭俄興涼雨飄□四顧弓驚綠秧濯□
中賦蛤□□□□此絕可□缺二行又五字然問□□□中
家樵問保拘志乎□也誠之識之

方信孺題名

高五尺三寸一行十四字
字徑三寸四五分正書

方孚若侍親婁游嘉定癸酉荐九

日

右刻在王正巳題名之左